



Inatsisartumut ilaasortaq  
Malik Berthelsen  
Siumut

## Oqaatsitigut ajornartorsiutillit pillugit § 36 nappertorlugu apeqqummut nr. 2010-51-imut akissut

Inatsisartut suleriaasianni § 36, imm. 1 naapertorlugu 24. februar 2010 Naalakkersuisunut imatut apeqquteqarputit:

### **Qallunaatut piginnaasakinneq pissutigalugu ilinniakkamik aallartisisinnaangitsut ajornartorsiutillilluunniit arlaatigut aaqqiivigineqarnissaat Naalakkersuisut pilersaarutiginerlugu?**

10. marts 2010  
Sagsnr. 2010-026736  
Dok. Nr. 327744

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: kiin@gh.gl  
www.nanoq.gl

**Akissut:** Tunngaviusumik pissutsit pingasut pissutaallutik ilinniagaqartut qallunaatut pisinnaasakinnertik pissutigalugu inuussutissarsiutinut ilinniarfitsinni ilinniakkamik naammassinninnissamat ajornartorsiuteqartarput:

- Ilinniartitsisut kalaallisut oqaasillit amigaataanerat pissutaalluni ilinniartitsisut qallunaatuinnaq oqaasillit amerlasuut atorineqarnissaat pisariaqalersarpoq.
- Ilinniartitsinermit atortut kalaallisut amigaataanerat pissutaalluni ilinniutit qallunaatut allasimasut il.il. amerlasuut atorineqarnissaat pisariaqalersarpoq.
- Ilinniarfissat praktikkerfissallu kalaallisut oqaaseqarfiusut amigaataanerat.

Taamaalilluni ilinniartitsisarnerup aaqquissuusaanerani piffissamat sivisuumut ajornartorsiuteqarneq pineqarpoq, tassa Kalaallit Nunaanni suliffeqarfeqarnermi suliap ingerlanneqarnissaanut ilinniartitsisut kalaallisut oqaasillit pisariaqartumik amerlassusillit maannamat amigaatigineqarmata.

Taamatulli oqareerluni takullugu nuannerpoq piffissap ingerlanerani ineriartorneq ajunngitsumik ingerlasoq, tassa ilinniartitsisut suliamillu ingerlatsisut kalaallisut oqaasillit amerlanerujartortut ilinniartinneqartalerata, taassumalu kingorna inuussutissarsiutinut ilinniarfinni ilinniartitsisutut sulinissaq qinertarlugu. – Ullumikkut inuussutissarsiutinut ilinniarfini ilinniartitsisut affangajaat kalaallisut oqaaseqartuupput. Tamassuma kinguneranik inuussutissarsiutinut ilinniarfinni ataasiakkaani fagini arlalinni ilinniartitsineq kalaallisut ingerlanneqartarpoq. Assersuutigalugu oqaatigineqarsinnaavoq ilinniakkani ukunani ilinniartitsineq kalaallisuinnangajak ingerlanneqartarpoq:

- Piniartutut Aalisartutullu Ilinniarfik
- Inunnik Isumaginninnermut Peqqinnissamullu Tunngaviusumik Ilinniarfiit
- Imarsiornermut Tunngaviusumik Ilinniarfiit
- Savaatilittut ilinniarfik
- Arnat Ilinniarfiat

Inuussutissarsiutinut ilinniarfitsinni kalaallisut ilinniartitsinissamik neqerooruteqartarneq annertusiartoraluartoq pisariaqarpoq, ilinniartut qallunaatut tunngaviusumik pisinnaasaqarlutik ilinniakkaminnik aallartitsisarnissaat, tassa ilinniartut ilinniakkaminnik ingerlatsinerminni qallunaatut oqaasilinnik ilinniartitsisoqarnissartik, ilinniarnermi atortunik qallunaatoortunik atuarnissartik imaluunniit praktikkerfinni ilinniarfinnilu qallunaatut oqaaseqafiusuni ingerlanissartik pinngitsoorsinnaanngimmassuk.

Inuussutissarsiutinut ilinniarfinnut qinnuteqartut amerlanersaat meeqqat atuarfianni atuarnerminni pisariaqartumik qallunaatoorsinnaalersarput. Atuarfitsialaap aallartinneqarnerani meeqqat atuarfianni fagini qallunaatut aamma tuluttut allat oqaasiinik ilinniartitsineq annertuumik nukittorsarneqarnikuunera ilaatigut pissutigalugu.

Nassuerutigisariaqarporli ilinniagaqarnissamut qinnuteqartut ikinnerit tiguneqarsinnaasanngitsut qallunaatut pisinnaasaasa amigarneri pissutigalugu – akuttunngitsumik meeqqat atuarfianni atuarsimanerisa iluatsinngitsumik pissutigalugu imaluunniit meeqqat atuarfianni atuarsimanerisa pisoqalivallaarsimanera pissutigalugu.

Naalackersuisut anguniagaraat kalaallit sulisut 2/3-iisa 2020-mi pisinnaasaqarfiliikkamik ilinniarsimasuussasut. Anguniagaq tamanna piviusunngortinneqassappat pisariaqarpoq, ilinniagaqarnissamik qinnuteqartut ilinniagaqarnermik aallartitsinissami piumasaqaatinik pisinnaasaqanngitsut, suliamik oqaatsitigulluunniit pisinnaasaasa qaffassarnissaannik neqeroorfigineqarnissaat.

Qinnuteqartut qallunaatut naammannngitsumik pisinnaasaqartut eqqarsaatigalugit, qinnuteqartut oqaatsitigut pisinnaasaat Piareersarfiit qaffassartissinnaavaat, taaneqartartoq *Akuerisaasumik Inuussutissarsiutinut Ilinniagaqarnermi Aallarnisaasumik Atuartitaaneq* (AEU). Pikkorissarnerni AEU-ni tamaattuni fagini qallunaatut, kalaallisut, tuluttut aamma matematikkimi tunngaviusumik ilinniartitsinissaq neqeroorutigineqartarpoq, inuussutissarsiutinut ilinniagaqarnermik naammassinninnissaq siunertaralugu.

Pisuni allani qinnuteqartut oqaatsitigut sulinissamullu pisinnaasaat amigartarput, tassungalu ilanngullugu inerisimanerat amigartarluni imaluunniit inoqatinut attaveqartarnermi pisinnaasaat amigartarlutik il.il. Taamatut pisoqartillugu qinnuteqartup Kalaallit Nunaanni imaluunniit Qallunaat Nunaanni atuarnissaannik Piareersarfiit innersuussisinnaapput, tassani sulisinnaanermik oqaatsitigullu pisinnaasat qaffassarneqarnerisa saniatigut efterskolemi peqatigiinneq aqutitigalugu pitsaasumik suliamik ingerlatsisinnaaneq inunnillu attaveqartarnermi suleqatigeeriaatsit ilinniarneqartarlutik.

Taamatullu qinnuteqartut utoqqaanerit Kalaallit Nunaanni imaluunniit Qallunaat Nunaanni højskolernissaannik innersuussisoqarsinnaavoq, imaluunniit Oqaatsinik Pikkorissarfimmi qallunaatut sakkortuumik pikkorissarnissaannik innersuussisoqarsinnaalluni.

Piareersarfiit ataqatigiissaarisoralugit ilitsersuineramik, nalilersuineramik taassumalu kingorna ilinniagaqarniartut ilinniagaqarfinni oqaatsitigut suliamillu ingerlatsisinnaanermik piumasaqaatinik amigaateqartunut Naalackersuisut taamaalillutik ataqatigiissaakkanik suliamillu ilisimasaqarfiusunik assigiinngitsunik neqerooruteqarput.

Inussiarnersumik inuulluaqqusilluta

Mimi Karlsen